



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-I/25-1-40-216-7/21**

Datum: **10.12.2021. godine**

„Agencija za vodno područje rijeke Save“ Sarajevo (u daljnjem tekstu: Agencija) rješavajući po zahtjevu pravnog lica „PARAFERM-PLAST“ d.o.o. Bihać, za izdavanje prethodne vodne saglasnosti za ispuštanje oborinskih onečišćenih voda sa lokacije objekta za skladištenje i preradu sekundarnih sirovina (uglavnom plastičnih masa), izgrađenog u Ul. Bihaćkih branilaca br. 89., grad Bihać, na osnovu člana 109. stav (1) tačka 2. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi:

R J E Š E N J E **o prethodnoj vodnoj saglasnosti**

1. Podnosiocu zahtjeva, „PARAFERM-PLAST“ d.o.o. Bihać, daje se prethodna vodna saglasnost za ispuštanje oborinskih onečišćenih voda sa lokacije objekta za skladištenje i preradu sekundarnih sirovina – plastičnih masa, izgrađenog u Ul. Bihaćkih branilaca br. 89., na zemljištu označenom kao k.č. broj 3224/4, K.O. Bihać-grad (novi katastarski operat), grad Bihać.

Prethodna vodna saglasnost se može koristiti isključivo u postupku pribavljanja okolinske dozvole i urbanističke saglasnosti od strane nadležnih organa.

2. Ova prethodna vodna saglasnost, se odnosi isključivo na ispuštanje oborinskih onečišćenih voda sa prostora depoa i manipulativnih vanjskih površina oko postojećeg objekata, na prostoru koji je definisan tačkom 1. ovog rješenja i ne oslobađa podnosioca zahtjeva obaveze pribavljanja prethodne vodne saglasnosti za korištenje vode i ispuštanje sanitarno-fekalnih otpadnih voda, za čije je izdavanje nadležno Ministarstvo poljoprivrede, vodoprivrede i šumarstva Unsko-sanskog kantona u skladu sa članom 139. stav (2) tačka 1. i 2. Zakona o vodama.
3. Prethodna vodna saglasnost se daje na osnovu činjeničnog stanja utvrđenog pregledom dostavljene dokumentacije i pod slijedećim uslovima:
 - 3.1. Da je planirana aktivnost na depou ispred objekata i u samom objektu hale za mljevenje i preradu plastičnih masa usklađena sa važećom prostorno-planskom dokumentacijom grada Bihaća.
 - 3.2. Da se na osnovu proračunatih količina i sastava otpadnih voda koje mogu nastati na predmetnom lokalitetu, otpadnih voda sa svih pripadajućih površina oko objekta, saobraćajnih i parkirnih, i sanitarnih otpadnih voda, uradi investiciono tehnička dokumentacija sistema za prikupljanje otpadnih voda – separatnog tipa, sistema za prečišćavanje nastalih otpadnih voda i ispuštanje prečišćenih voda u recipijent. Investiciono tehnička dokumentacija mora biti urađena na nivou glavnog projekta za pribavljanje odobrenja za građenje, sukladno važećom zakonskom regulativom vezano za građenje.
 - 3.3. Investiciono-tehnička dokumentacija treba biti urađena i revidovana od strane pravnog lica koje ima ovlaštenje (lista «A») pribavljeno od strane Federalnog ministarstva poljoprivrede, vodoprivrede i šumarstva i treba da obradi sva pitanja definisana članom 5. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19 i 41/20) koja su bitna za konkretan slučaj, a naročito:
 - Proračun potrebnih količina vode za nesmetan rad objekta (potrebne količine vode za pranje i održavanje površina unutar i oko objekta).
 - Proračun kvantitativnih i kvalitativnih karakteristika otpadnih voda (oborinskih onečišćenih voda) sa predmetnog lokaliteta.
 - Tehničko-tehnološko rješenje prikupljanja, prečišćavanja i ispuštanja prečišćenih voda u utvrđeni recipijent sa svim potrebnim proračunima, tehničkim opisom i grafičkim prilogima.

- Dati osnovne podatke o recipijentu, sa detaljem ispusta prečišćenih voda u isti. Lokalitet ispusta prečišćenih voda mora biti naznačen na situaciji adekvatne razmjere, kao i mjesto vršenja monitoringa prečišćenih voda (okno za uzimanje uzoraka);
 - Tehničko rješenje za monitoring i način monitoringa zahvaćenih i ispuštenih otpadnih voda u utvrđeni recipijent.
 - Sagledati mogućnost nastajanja i drugih neželjenih uticaja na kvalitet površinskih i podzemnih voda i dati prijedlog mjera za ublažavanje istih.
- 3.5. Samo oborinske vode sa krovova se mogu bez prečišćavanja upustiti u recipijent.
 - 3.6. Usvojenim sistemom prečišćavanja otpadnih voda mora se obezbjediti da prečišćene otpadne vode, prije ispuštanja u recipijent, moraju da zadovolje granične vrijednosti emisije definisane u tabeli 1.1. (kolona 3) date u prilogu 1. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj: 26/20),
 - 3.7. Projektnom dokumentacijom sagledati sve moguće neželjene uticaje kako na planirani objekt, tako planiranih sadržaja na druge objekte i postrojenja, stečena prava korisnika, postojeću infrastrukturu, naselja i sl. i dati prijedlog mjera za uklanjanje odnosno ublažavanje tih utjecaja.
 - 3.8. Projektnom dokumentacijom definisati da se opasni materijal i otpad, u toku rada predmetnog objekta, ne smije ni privremeno odlagati na česticu «vodno dobro», odnosno u vodotok i na njegove obale.
 - 3.9. Pri izradi tehničke dokumentacije pridržavati se pravila struke i nauke te zakonske regulative vezane za ovakvu vrstu radova te ekološko-ekonomskih zahtjeva.
 - 3.10. Investiciono tehnička dokumentacija mora biti urađena na nivou projekta za pribavljanje odobrenja za građenje – odnosno odobrenja za upotrebu već izgrađenog objekta, te u skladu sa uslovima iz ove prethodne vodne saglasnosti i uslovima ostalih nadležnih organa ukoliko isti nisu u suprotnosti sa uslovima iz ovog Rješenja.
4. Nakon izrade projektne dokumentacije u skladu sa uslovima iz dispozitiva ovog rješenja i reviziji iste, a prije pribavljanja odobrenja za upotrebu-korištenje objekta, korisnik prethodne vodne saglasnosti dužan je ovoj Agenciji podnijeti zahtjev za izdavanje vodne saglasnosti na projektnu dokumentaciju za ispuštanje otpadnih voda sa lokaliteta objekta u recipijent, postojeći kanizacioni sistem grada Bihaća.
 5. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19 i 41/20).

Uz zahtjev se prilaže :

- 5.1. Revidovana Investiciono-tehnička dokumentacija urađena u skladu sa uslovima iz dispozitiva ovog rješenja.
 - 5.2. Rješenje o urbanističkoj saglasnosti za predmetni objekt prikupljanje i prerada plastičnih masa.
 - 5.3. Rješenje o okolinskoj dozvoli za predmetni objekt (ako planirana aktivnost podliježe propisu izdavanja okolinske dozvole).
 - 5.4. Rješenje o prethodnoj vodnoj saglasnosti za zahvat vode i ispuštanje sanitarnih otpadnih voda iz objekta od strane nadležnog Kantonalnog Ministarstva.
 - 5.5. Dokaz o izvršenoj uplati administrativne pristojbe u iznosu od 60 KM.
6. Ova prethodna vodna saglasnost se daje sa rokom važenja od 3 (tri) godine od dana pravosnažnosti rješenja i ista prestaje da važi ukoliko ne bude pribavljena urbanistička saglasnost za izgrađeni predmetni pogon i ne bude podnesen zahtjev za izdavanje vodne saglasnosti.
 7. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavjestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.

O b r a z l o ž e n j e

Podnosilac zahtjeva „PARAFERM-PLAST“ d.o.o. Bihać, obratio se ovoj Agenciji dana 12.05.2021. godine sa zahtjevom za izdavanje prethodne vodne saglasnosti za ispuštanje oborinskih onečišćenih voda sa prostora objekta izgrađenog u Ul. Bihaćkih branilaca br. 89., grad Bihać.

U provedenom postupku, uz zahtjev za izdavanje prethodne vodne saglasnosti dostavljena je i pregledana slijedeća dokumentacija:

- Ovjerena kopija Rješenja o registraciji u sudskom registaru subjekta upisa, izdanog dana 28.08.2020. godine od strane Općinskog suda u Bihaću, broj 017-0-Reg-20-000422,
- Ovjerena kopija Uvjerjenja o registraciji/upisu u Jedinstveni registar obveznika indirektnih poreza pravnog lica „Paraferm-Plast“ doo Bihać, izdat od strane Uprave za indirektno - neizravno oporezivanje Banja Luka, od 25.09.2020. godine,
- Ovjerena kopija Uvjerjenja o registraciji poreznog obveznika, izdanog dana 02.09.2020. godine od strane Federalnog ministarstva finansija - Porezne uprave – Kantonalnog poreznog ureda Bihać,
- Kopija Rješenja o prethodnoj vodnoj saglasnosti investitoru „Paraferm-Plast“ doo Bihać, izdato od strane Grada Bihaća pod brojem: 04/2-21-1364/21 od dana 24.06.2021. godine,
- Kopija Rješenja kojim se **dosuđuju** nekretnine izvršenika DD „Šipad Bina“ Bihać, ponuđaču „FINIŠ“ doo Velika Kladuša, donešeno u Opštinskom Sudu u Bihaću pod brojem: 017-0-Ip-08-000717 od dana 18.09.2019. godine,
- Kopija Ugovora o zakupu poslovnog prostora između „Finiš“ doo Velika Kladuša kao zakupodavaoca i „Paraferm-Plast“ doo Bihać kao zakupoprimaloca o zakupu skladišnog prostora površine 1725 m², objekta koji se nalazi na k.č. 3223/4,
- Kopija Potvrde o izgradnji zatvoreno-otvorenog kanala za odvodnju površinskih voda, izdata od strane Skupštine Opštine Bihać pod brojem: 09-353-1-17-2/73. od dana 06.03.1973. godine,
- Kopija Rješenja kojim se daje saglasnost na glavne projekte tvornice kancelarijskog namještaja u Bihaću izdato od strane Republičkog sekretarijata za Zdravstvo i socijalnu politiku Sarajevo, pod brojem: 06-53-337/73. od 20.03.1973. godine,
- Kopija uplatnice upravne pristojbe,
- Kopija -Zemljišnoknjižni izvadak BROJ: 017-0-NAR-20-004 229, Zemljišnoknjižni uložak broj: 29, Katastarska općina: BIHAĆ-GRAD, izdan od strane ZEMLJIŠNOKNJIŽNOG UREDA Općinskog suda u Bihaću dana 30.10.2020. godine, o vlasništvu parcele k.č. 3223/4,
- Studija za prethodnu vodnu saglasnost za objekat skladišta sekundarnih sirovina sa pratećim sadržajima „PARAFERM-PLAST“ doo Bihać, urađena od strane „Euroing“ d.o.o. Bihać, pod brojem SPVS 07-05/21, od maja 2021. godine, u Bihaću.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav 1. Zakona o vodama („Službene novine Federacije BiH“, broj 70/06) o zahtjevu je dana 23.10.2021. godine obaviještena javnost putem obavještenja na oglasnim pločama „Agencije za vodno područje rijeke Save“ u Sarajevu i Ureda u Bihaću, te u dnevnim novinama Oslobođenje Sarajevo, te u datom roku nije bilo pisanih izjašnjenja o predloženim aktivnostima iz zahtjeva.

Opis objekta i način provođenja pomenutih aktivnosti obrađena je i definisana u Studija za prethodnu vodnu saglasnost za objekat skladišta sekundarnih sirovina sa pratećim sadržajima „PARAFERM-PLAST“ doo Bihać, urađena od strane „Euroing“ d.o.o. Bihać, pod brojem SPVS 07-05/21, od maja 2021. godine, u Bihaću.

U provedenom postupku konstatovali smo slijedeće:

Predmetni objekat izgrađen je u Ul. Bihaćkih branilaca br.89., Grad Bihać.

Na prostoru predmetnog objekta su slijedeći sadržaji-objekti: hala za mljevenje i preradu plastičnih masa sa kancelarijom i sanitarnim prostorijama, te pristupne saobraćajnice, parkirne površine i depo sa manipulativnim radni prostor.

Kompleks se planira snabdijevati vodom za sanitarne potrebe i protivpožarnu zaštitu (1 m³/dan), sa javne gradske vodovodne mreže.

Za prečišćavanje oborinskih voda sa internih saobraćajnih i radnih površina je predviđena ugradnja separatora ulja i masti koji treba da zadovoljava EN 858-2.

Preliv iz separatora će biti izveden u gradski kanalizacioni sistem grada, preko monitoring okna.

Navedena lokacija (prema izvodu iz Prostorno-planske dokumentacije grada Bihaća, nalazi se u obuhvatu poslovnog dijela prostora bivše drvne industrije Šipad u Bihaću) ista nije locirana u prostoru javnog vodnog dobra, zoni plavljenja niti unutar utvrđenih zona sanitarne zaštite izvorišta vode za piće.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, kao i onemogućavanja degradacije kvaliteta voda, podnosiocu zahtjeva su ovim vodnim aktom, u tački 3. dispozitiva rješenja, shodno odredbama člana 111. Zakona o vodama («Službene novine Federacije BiH» broj 70/06) i člana 5. i člana 10. stav (3) Pravilnika o sadržaju, obliku, uslovima, načinu izdavanja i čuvanja vodnih akata

(«Službene novine Federacije BiH», broj 31/15, 55/19 i 41/20), propisani uslovi koje je Investitor dužan ispuniti prilikom izrade projektne dokumentacije, a koja će Investitoru biti potrebna u postupku pribavljanja vodne saglasnosti i odobrenja za građenje.

Na osnovu utvrđenog stanja i provedenog postupka doneseno je rješenje kao u dispozitivu ovog Rješenja. Podnosilac zahtjeva je uplatio upravnu pristojbu od 80,0 KM u skladu sa članom 7. stav 1. tarifni broj 43. Zakona o federalnim upravnim taksama („Službene novine Federacije BiH”, broj 6/98, 8/00, 45/10 i 45/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,00 KM administrativne takse, prema tarifnom broju 3. Tarife federalnih administrativnih taksi.

Obradivač akta:

Fuad Mujagić, dipl. inž.

Po ovlaštenju

Rukovodilac sektora za izdavanje vodnih akata



Haris Ališehović, dipl. inž. građ.

Dostaviti:

- „PARAFERM-PLAST“ d.o.o.Bihać, Ul.Bihaćkih branilaca br.89. 77000 Bihać,
- AVP Sava, ISV – Vodna knjiga
- Sektor 40, arhiva
- ⊖ Oglasna ploča - AVP Sava